

Il Profil cun Urs Cadruvi n'ha betg violà il principi d'objectività

L'istanza independenta ha discutà e decidì il cas il venderdi passà a Berna

■ **(anr/vi) L'UBI refusa il recurs en-cunter l'emissiun Profil cun Urs Cadruvi. La moderatura dal Radio Rumansch haja tschentà dumondas provotgantas, l'antier secretari da la Lia haja dentant gi chaschun da sa dustar ed ils auditurs hajan savi trair atgnas conclusiuns.** La decisiun è crudada a moda clera suenter la procedura publica il venderdi passà a Berna: Cun set cunter nulla vuschs ha l'Instanza independenta per radio e televisiun (UBI) refusà il recurs. Inoltrà la protesta n'ha betg il pertugà sez, mabain in auditur en furma d'in recurs popular cun suetegn da passa ventg persunas.

Per il solit maina *Vincent Augustin* sco president da l'UBI las proceduras. Il venderdi ha el dentant prendi recusa per evitar la parita da partischanza, damai ch'el è stà president da la Lia cura che *Urs Cadruvi* era vegnì elegì avant diesch onns sco secretari.

Ina tscherta chapientscha

Il recurrent ha fatg valair ch'il stil offensus da la moderatura *Oceana Galmarini*

haja violà las reglas da respect e hoffiadad. Sulet ils adversaris da l'antier secretari sajan vegnids a pled en l'emissiun, ins haja scuntrà quint, n'haja numnà in summa nagins merits e tratg nanavant chaussas privatas.

Ils commembers da l'UBI han mussà ina tscherta chapientscha per la protesta. L'emissiun Profil saja per il solit pli indulgenta ed ins tschentia plitost dumondas curteschavilas. Ils auditurs na sajan betg disads d'udir in stil confruntativ e spetgian insatge auter. «Sch'ins tschentia en l'emissiun 'Aeschbacher', na vul ins er betg tadlar 'Schawinski'», ha constatà ina commembra da l'UBI. Las medias grischunas pratitgeschian forsà en general in stil pli miaivel che las medias en il rest da la Svizra.

Sin quest stil pli confruntativ avess la moderatura duì far attent a l'entschatta da l'emissiun, han remartgà plirs commembers.

Moderatura è stada correcta

Ma durant l'emissiun saja la moderatura adina stada correcta e transparenta.

Ella haja empruvà da far vegnir ord la crosta il giast ed haja explicitamain ditg ch'ella tschentia dumondas provotgantas, han constatà ils commembers da l'UBI. Il giast – ina persuna versada cun las medias – na saja mai sa dustà cunter ina dumonda, mabain haja anzi da sai anora anc relatà chaussa privatas da ses divorzi, da sias relaziuns e da sia famiglia.

«Jau sco betg Rumantscha hai intervegnì bler davart il giast en questa emissiuin, davart el sco persuna privata, sco era davart las difficultads cumbinadas cun sia posiziun», ha ditg ina commembra da l'UBI.

L'emissiun haja mussà tge cumbats virulents ch'i dettia en Rumantschia e che Cadruvi saja ina persuna che tschertgia la pasch e possedia varts sensiblas.

Durant la procedura han ins era fatg menziun ch'il Profil saja vegnì registrà diesch dis avant ch'emetter. Il Radio Rumansch haja perfin anc fatg amogna al giast da stritgar passaschas, tge che medias na fetschian uschiglio betg. Ma Cadruvi haja desisti.

Betg da cumparegliar cun novitads

Tenor il principi d'objectività sto il public durant in'emissiun avair la chaschun da far in agen maletg. Il venderdi è l'UBI vegnida unanimamain a la conclusiuin ch'il Profil n'haja betg violà quest principi, perquai che Cadruvi haja già la chaschun durant bunamain in'ura da prender posiziun tar tuttas criticas.

La libertad da radio e televisiun lubschia als emitturs da far er ina giada ina emissiuin controversa, ha constatà la vicepresidente da l'UBI *Claudia Schoch*. Impurtant saja ch'il public na vegnia betg manipulà e gliez na saja qua betg stà il cas. Ina emissiuin sco il Profil na possian ins betg cumparegliar cun emissiuins da novitads u cun emissiuins avant votaziuns u elecziuns. Là tschentian ins pretenziuns pli severas e tant adversaris sco aderents stoppian lura vegnir a pled a moda equilibrada. Per in summa chapir e pudair giuditgar han ils commembers da l'UBI già a disposiziun ina translaziun uffiziala da quest Profil. La decisiun dal venderdi passà vegn publicgada en radund dus mais per rumantsch sin la pagina d'internet da l'UBI.